

*IKA-3 ARALIN*

**ANG IYONG AMA AY  
NAGSASALITA  
SA IYO**



**Sa Araling Ito'y Pag-aaralan Mo  
Nais Kang Kausapin Ng Diyos  
Nangungusap Ang Diyos Sa Maraming  
Kaparaanan  
Paano Naisulat Ang Aklat Ng Diyos  
Pagtukoy Sa Mga Reperensya Sa Biblia  
Ang Pagdinig Sa Tinig Ng Diyos**

**Nais Kang Kausapin Ng Diyos**

Sinong ama ang hindi nagagalak na makipag-usap sa kanyang mga anak kahit nuong sila'y mga sanggol pa lamang at ngiti ang naisasagot?

Nais din ng iyong Ama sa langit na makipag-usap sa Kanyang mga anak, ipamalas ang Kanyang pag-ibig, turuan sila't tulungan sa kanilang suliranin. Gusto mo bang marinig ang tinig Niya?

### Ang Gagawin Mo

#### 1. Ang Diyos

- a) ay nagagalak na makipag-usap sa Kanyang mga anak.
- b) ay napakabanal upang makipag-usap sa atin.
- k) ay hindi na nakikipag-usap sa mga tao ngayon.

Sagot: 1. a) ay nagagalak na makipag-usap sa Kanyang mga Anak.

### Nangungusap Ang Diyos Sa Maraming Kaparaanan

Noong una, nagsalita ang Diyos sa ating mga ninuno, sa iba't ibang panahon at sa iba't ibang paraan sa pamamagitan ng mga propeta, nguni't ngayon siya'y nagsalita-sa atin sa pamamagitan ng Kanyang Anak. Sa pamamagitan ng Anak ay nilikha ng Diyos ang sansinukob at Siya ang itinalaga Niyang magmay-ari ng lahat ng bagay. Hebreo 1:1,2.

Narito ang ilan sa mga kaparaanan ng pagsasalita sa iyo ng Diyos:

▲ **Tuwiran Sa Puso Mo**

Ipinadarama sa iyo ng Espiritu Santo na si Jesus ay buhay na buhay. Maaari Siyang mangu-sap sa iyong budhi, ipinadarama sa iyo ang dapat mong gawin, o binabalaan ka sa paggawa ng isang bagay. Maaaring linawin Niya sa iyo ang isang katotohanang espirituwal. O kaya'y makadama ka ng masidhing udyok na gawin ang nais ng Diyos. Kung ikaw ay mananalangin, hilingin mo sa Diyos na kausapin ka Niya at asahan mong maririnig Siyang mangungusap sa puso mo.

**Ang Gagawin Mo**

2. Paano tuwirang nangungusap sa puso mo ang Diyos?

(Pumili ng dalawa)

- a) Maririnig mong lagi ang tinig na ka-gaya ng sinumang tao.
- b) Makadarama ka ng udyok na gawin ang isang bagay.
- k) Kailangang magkaroon ka ng pangi-tain o managinip ka.
- d) Maaaring biglang lumiwanag sa iyo ang isang katotohanang espirituwal.

Sagot: 2. b) Makadarama ka ng udyok na ga-win ang isang bagay.

d) Maaaring biglang lumiwanag sa iyo ang isang katotohanang es-pirituwal.

### ▲ Sa Pamamagitan Ng Kanyang Mga Pagpapala

Maraming Cristiano ang nagsasabing nag-iiba ang anyo ng buong sanlibutan mula nang ipanganak silang muli. May panibagong pagpapahalaga ka sa mga pagpapala ng Diyos sa pagtingin mo sa iyong paligid. Madarama mong naroon Siya sa kamangha-manghang kalikasan. Nangungusap Siya sa pamamagitan ng tugtugin at sining. Ang kalapitan Niya ay nasa magandang pagtitinginan ng mga Cristiano. Libong pagpapala sa palibot mo ang maghahayag ng kabutihan ng Diyos. Tinutugon Niya ang iyong dalangin. Nakikita ng mata ng pananampalataya ang pagngiti ng Diyos at naririnig ng tainga ng iyong espiritu ang ganito "Anak Ko, mahal kita."

#### Ang Gagawin Mo

3. Nangusap na ba sa iyo ang Diyos? \_\_\_\_\_ kailan? \_\_\_\_\_
4. Magbigay ng ilang pagpapalang nalalaman mong sadyang mahal ka ng Diyos.

---



---



---

### ▲ Sa Pamamagitan Ng Ibang Mga Cristiano

Kung minsan, sinasaway ng nakatatandang anak ang nakababata, "Huwag! Ayaw ng Tatay ng ganyan!" O kaya'y "Ganito ang ibig ng Tatay."

Nangungusap din ang Diyos sa Kanyang mga anak sa pamamagitan ng nakatatandang kapatid sa Panginoon. Nais Niyang lagi tayong magtitipon upang magamit Niya ang ibang Cristianong makapagpasigla, makapag-akay, at makatulong sa atin.

Pasakop kayo sa isa't isa tanda ng iyong paggalang kay Cristo. Efeso 5:21.

### Ang Gagawin Mo

5. Natulungan ka na ba ng ibang Cristianong makaunawa sa ibig ipagawa sa iyo ng Diyos? \_\_\_\_\_
6. May nakapagpasigla na ba sa iyo upang maging lalong mabuting Cristiano? \_\_\_\_\_  
Sino? \_\_\_\_\_
7. Pasalamatang ang Diyos ngayon sa mga paraan ng pakikipag-usap Niya sa Kanyang mga anak. Hilinging gamitin ka Niya upang matulungan mo ang ibang makasumpong ng kaligtasan, o mapasigla naman ang iba sa pagsunod sa Panginoon.

#### ▲ Sa Pamamagitan Ng Mga Kaloob Na Espirituwal

Inilagay ng Espiritu Santo sa Iglesya ang iba't ibang kaloob na espirituwal. Nangungusap Siya sa atin sa pamamagitan nito. Ang mensahe

para sa Iglesia ay ibinibigay Niya sa mga pastor, guro, ebanghelista, at manunulat. Ibig Niyang ibahagi sa bawa't Cristiano ang katotohanan ng Diyos. Ang madalas na pagdalo sa gawain sa Iglesia ay mahalaga. Sa tuwing dadalo ka, pakinggan mo ang ipinasasabi sa iyo ng iyong Ama sa Langit.

Sapagka't saanman may dalawa o tatlong nagkakatipon dahil sa akin, naroon Akong kasama nila. Mateo 18:20.

### Ang Gagawin Mo

8. (Pumili ng dalawa.) Ang Diyos ay nangungusap kung minsan sa mga tao sa pamamagitan ng
  - a) pangangaral ng pastor o ebanghelista.
  - b) mga espiritista.
  - k) pangkukulam
  - d) polyeto o aklat na sinulat ng mga Cristianong manunulat.
9. Kapag nasa Iglesia ka, inaasahan mo bang mangungusap ang Diyos sa iyo? \_\_\_\_\_
10. Nangusap na ba sa iyo ang Diyos sa pamamagitan ng aklat na ito? \_\_\_\_\_
11. Hilingin sa Diyos na mangusap Siya sa iyo sa bawa't aralin.

Sagot: 8. a) pangangaral ng pastor o ebanghelista.

d) polyeto o aklat na sinulat ng mga Cristianong manunulat.

### ▲ Sa Pamamagitan Ng Mga Awit

Madalas na kinakausap ka ng Diyos sa titik ng isang awiting Cristiano o koro. Magugulat ka na malimit na ibinabalik Niya sa iyong alaala ang mga salita ng isang awit kapag kailangan mo ang mensahe nito.

At sama-samang ipahayag ang inyong damdamin sa pamamagitan ng mga salmo, mga imno at mga awiting espirituwal. Kayo'y buong pusong umawit at magpuri sa Panginoon. Efeso 5:19.

### Ang Gagawin Mo

12. Patulong sa Panginoon upang matutuhan mo agad ang mga awit at korong inaawit sa iglesya. Awitin ito sa tahanan hangga't maaari.
13. Ugaliing namnamin ang iyong inaawit. Awitin ito ng mataos sa puso. Patulong sa Panginoon upang isabuhay mo ang mga salita ng mga awit.

## ▲ Sa Pamamagitan Ng Biblia.

Kinakausap ka ng Diyos sa pamamagitan ng Kanyang Aklat, ang Santa Biblia. Ito ang pinakatiyak na paraan ng pag-alam sa Kanyang mensahe. Hindi laging panaginip at pangitain. Maaaring madama mong nais ng Diyos na gawin mo ang isang bagay, nguni't ito pala'y kagustuhan mo lamang. Kaya, paano mo malalaman ang tinig ng Diyos?

Pasalamatan ang Diyos na ang Kanyang mensahe ay nakasulat sa Biblia para sa iyo. Dapat mong subukin ang lahat ng bagay ayon sa sinasabi ng Diyos sa Biblia. Kaya nga, mahalagang pag-aralan ang Salita ng Diyos, gaya ng ginagawa mo ngayon. Sa pamamagitan ng mga batayang pag-aaral na ito'y maiintindihan mong lalo ang Biblia. Matututuhan mong isabuhay ang mga itinuturo nito.

Idilat Mo ang aking mga mata, upang ako'y makakita ng kagila-gilalas na mga bagay sa iyong kautusan. Magpakailan man, O Panginoon, ang Iyong Salita ay natatag sa langit. Ang Salita Mo'y ilawan sa aking mga paa, at liwanag sa aking landas. Ang bukas ng Iyong mga Salita ay nagbibigay ng liwanag; nagbibigay ng unawa sa walang muwang. Ang kabuuan ng Iyong Salita ay katotohanan. Mga Awit 119:18, 89, 105, 130, 160.



### Ang Gagawin Mo

14. Ang pinakatiyak na paraan ng pag-alam sa mensahe ng Diyos sa iyo ay

- a) sa pag-aaral kung ano ang sinasabi ng Diyos sa Biblia.
- b) pakikinig sa payo ng mga kaibigan.
- k) ayon sa nadarama mong dapat gawin.

Sagot: 14.a) sa pag-aaral kung ano ang sinasabi ng Diyos sa Biblia.



### Paano Nasulat Ang Aklat Ng Diyos

Sa loob ng maraming panahon, pumili ang Diyos ng mga taong matuwid upang sumulat ng Kanyang mensahe. Kinasihang sila ng Espiritu Santo, sinabi sa kanila ang dapat nilang isulat. Sa loob ng 1,600 taon, may 40 lalaki ang pinasulat ng Diyos. Ang Kanyang mensahe'y nasulat sa

66 na aklat na tinatawag na Mga Banal na Kasulatan. Magkakasang-ayon ang sinasabi at nagkakaisa ng paksa ang mga aklat na ito kaya't alam nating mula sa iisang May-Akda-- ang Diyos.

### Ang Gagawin Mo

15. (Dalawa ang piliin.) Ang mga taong sumulat ng Biblia

- a) ay mabubuting tao.
- b) ay binayaran ng isang hari upang isulat ito.
- k) ay kinasihan ng Espiritu Santo.
- d) ay gumawa ng maraming kamalian.

Mga Sagot: a) ay mabubuting tao.  
k) ay kinasihan ng Espiritu Santo.

Maraming taon na ang nakalilipas, niloob ng Diyos na tipunin ng Kanyang mga anak ang 66 na aklat na ito at gawing isang aklat. Ang Santa Biblia na ibig sabihin *ang mga aklat ng Diyos*. Ang unang 39 na aklat ay nasulat bago sumilang ang ating Panginoon Jesus. Tinatawag itong Matandang Tipan. Ang ikalawang bahagi naman ng Biblia ay tinatawag na Bagong Tipan. Narito ang 27 aklat na nasulat pagdating ni Jesus at gumawa ng bagong tipan sa pagitan ng Diyos at ng tao. Isinasaad dito ang mga itinatadhana ng tipang ito.

### Ang Gagawin Mo

16. Ang Biblia ay binubuo ng dalawang pangunahing bahagi na tinatawag na

- a) Matandang Tipan at Apocalipsis.
- b) Matandang Tipan at Bagong Tipan.
- k) Kautusan at ang mga Propeta.

17. Ilan ang mga aklat sa Biblia?

- a) May 39 na aklat sa Matandang Tipan at 27 sa Bago.
- b) May 29 na aklat sa Matandang Tipan at 37 sa Bago.

Mga Sagot: 16. b) Matandang Tipan at Bagong Tipan.

17. a) May 39 an aklat sa Matandang Tipan at 27 sa Bago.

Ang Matandang Tipan ay unang nasulat sa wikang Hebreo at ang Bagong Tipan ay sa Griyego. Napasaatin ang Aklat ng Diyos upang basahin ng lahat ng tao, kaya't tinulungan Niya ang Kanyang mga anak upang maisalin ito sa maraming wika.

Ngayon, may mga bahagi ng Bibliang naisalin na sa mahigit na 1,300 mga wika.

### Ang Gagawin Mo

18. Ang Biblia ay unang nasulat sa

- a) Hebreo at Latin.
- b) Kastila at Griyego.
- k) Pranses at Ingles.
- d) Hebreo at Griyego.

19. Ang Biblia ay

- a) isang aklat para sa lahat.
- b) para sa may mataas na pinag-aralan.
- k) para sa mga ministro lamang.

Mga Sagot: 18. d) Hebreo at Griyego.  
19. a) isang aklat para sa lahat.

Sa ilang mga wika, may ilang iba't ibang salin ng Biblia. Ang iba'y saling Protestante, at ang iba'y Catolico, subali't iisa ang sinasabi nila.

Ang mga talatang sinipi sa Matandang Tipan ay mula sa unang salin sa Tagalog na Biblia (King James Version). Ang mga talatang sinipi sa Bagong Tipan ay mula sa Tagalog Popular Version New Testament, tinatawag rin na Mabuting Balita para sa Ating Panahon.

### Ang Gagawin Mo

20. Ang mga talata sa Bagong Tipan na ginamit sa araling ito'y sinipi sa

-----a) King James Version.

----- b) Revised Standard Version.

----- k) Tagalog Popular Version New Testament.

Sagot: 20. k) Tagalog Popular Version New Testament.

### Pagtukoy Sa Mga Reperensiya

Bawa't aklat sa Biblia ay nahahati sa mga kabanata. Ang mga kabanata'y nahahati sa mga talata. May mga bilang ang mga talata upang matukoy natin ang bahaging hinahanap natin sa Biblia. Kung ibig mong itala ang isang talata sa Biblia, isulat muna ang pangalan ng aklat, saka ang bilang ng kabanata, susundan ng tutuldok (:), at ng bilang ng talata. Ang Juan 3:16 ay tumukoy sa Aklat ni Juan, Kabanatang 3, talatang 16.

Kapag dalawang talata ang tinutukoy, o mga talatang hindi magkakasunod, ihiwalay ng mga kuwit (.). Ang ibig sabihin ng Juan 3:16, 17, 20, ay Aklat ni Juan, kabanatang 3, mga talatang 16, 17, at 20. Ito ang isang reperensiya ng Kasulatan.

Ang gitling (-) sa pagitan ng dalawang talata ay nangangahulugang kasama ang lahat ng talata sa pagitan. Juan 3:16-22. Ibig sabihin, aklat ni Juan, kabanatang 3, mga talatang 16 hanggang 22.

Kung wala kundi dalawang magkasunod na talata, ihiwalay ng kuwit. Juan 3:16, 22, 23. Ibig sabihin, aklat ni Juan, Kabanatang 3, mga talatang 16, 22, at 23.

Kung tinutukoy mo ang mga talata sa magka-kaibang kabanata, gumamit ng tuldok-kuwit (;). Juan 3: 16; 6:24. Ibig sabihin aklat ni Juan, kabanatang 3, talata 16; at Juan kabanata 6, talata 24.

### Ang Pagdinig Sa Tinig Ng Diyos

Bago mo pakinggan ang isang himpilan ng radyo, dapat mong iayos ang pihitan. Paano mo iaayos ang pihitan ng iyong espiritu sa tinig ng Diyos? Naririto ang ilang paraan.

- ▲ Magbasa ng Biblia araw-araw.
- ▲ Patuloy na pag-isipan ang iyong binasa sa Biblia. Pagbulay-bulayin ang Salita.
- ▲ Ugaliin ang pag-uulit ng pagbasa at pagsasaulo ng mga talata sa Bibliang nagugustuhan.

Lahat ng Kasulata'y kinasihan ng Diyos at magagamit sa pagtuturo ng katotohanan, sa pagpapabulaan sa maling aral, sa pagtutuwid sa likong gawain, at sa pag-akay sa matuwid na pamumuhay,

Sa gayon ang lingkod ng Diyos ay magiging handa sa lahat ng mabubuting gawain.  
2 Timoteo 3:16-17.

Kung ngayon ka pa lamang magpapasimulang magbasa ng Biblia, simulan sa Bagong Tipan. Malinaw na malinaw na mangungusap sa iyo ang Diyos sa pamamagitan ng buhay at mga turo ni Jesus. Higit ang matututuhan mo tungkol sa bagong tipang ginawa ng Panginoon sa atin bago mo pag-aralan ang Matandang Tipan.

Noong una, nagsalita ang Diyos sa ating mga ninuno, sa iba't ibang panahon at sa iba't ibang paraan sa pamamagitan ng mga propeta. Nguni't ngayon, Siya'y nagsalita sa atin sa pamamagitan ng Kanyang Anak. Sa pamamagitan ng Anak ay nilikha ng Diyos ang sansinukob at Siya ang itinalaga Niyang magmay-ari ng lahat ng bagay. Hebreo 1:1,2.

- ▲ Palagiang dumalo sa iglesyang kariringgan mo sa Diyos.
- ▲ Manalangin araw-araw. Hingin sa Diyos na mangusap Siya sa iyo. Sa panalangin, maaaring ipikit ang mga mata upang huwag maabala sa mga bagay sa palibot mo. Huwag gaanong mag-salita sa Diyos. Hintayin Siyang mangusap sa puso mo.
- ▲ Umawit ng mga awiting Cristiano at isa-isip ang mga salita nito.

- ▲ Sanayin ang paghahanap sa kabutihan, kapangyarihan, at pagibig ng Diyos sa mga bagay na nasa paligid mo.
- ▲ Bumasa ng mga babasahing Cristiano at makinig sa mga palatuntunang panradyo tungkol sa ebanghelyo.
- ▲ Kausapin ang ibang Cristiano tungkol sa Diyos at sa Kanyang Salita.
- ▲ Gawin ang ipinagagawa sa iyo ng Diyos. Tandaang Siya ang iyong patnubay, sumunod ka nang bukal sa loob.
- ▲ Gawin mong mabuti ang iyong mga aralin sa aklat na ito at sa iba pang pag-aaral sa Biblia, at hingin sa Diyos na mangusap Siya sa iyo sa pamamagitan nito.